



AN COIMISIÚN
EORPACH

An Bhruiséil, 15.4.2020
COM(2020) 125 final

2018/0169 (COD)

**TEACHTAIREACHT ÓN gCOIMISIÚN
CHUIG PARLAIMINT NA hEORPA**

de bhun Airteagal 294(6) den Chonradh ar Fheidhmiú an Aontais Eorpaigh

maidir leis

**an seasamh ón gComhairle maidir le glacadh Rialacháin ó Pharlaimint na hEorpa agus
ón gComhairle maidir le híoscheanglais le haghaidh athúsáid uisce**

(Téacs atá ábhartha maidir le LEE)

**TEACHTAIREACHT ÓN gCOIMISIÚN
CHUIG PARLAIMINT NA hEORPA**

de bhun Airteagal 294(6) den Chonradh ar Fheidhmiú an Aontais Eorpaigh

maidir leis

**an seasamh ón gComhairle maidir le glacadh Rialacháin ó Pharlaimint na hEorpa agus
ón gComhairle maidir le híoscheanglais le haghaidh athúsáid uisce**

(Téacs atá ábhartha maidir le LEE)

1. CÚLRA

An dáta a seoladh an togra chuig Parlaimint na hEorpa agus chuig an gComhairle (doiciméad COM (2018) 337 final – 2018/0169 COD)	28 Bealtaine 2018
An dáta a ghlac Coiste na Réigiún a Thuairim maidir leis an togra	6 Nollaig 2018
An dáta a ghlac an Coiste Eacnamaíoch agus Sóisialta a Thuairim maidir leis an togra	12 Nollaig 2018
Dáta an tseasaimh ó Pharlaimint na hEorpa, an chéad léamh:	12 Feabhra 2019
Dáta chomhaontú na Comhairle maidir le cur chuige ginearálta	26 Meitheamh 2019
Dátaí na gcruinnithe tríthaobhacha	10 Deireadh Fómhair 2019 12 Samhain 2019 2 Nollaig 2019
An dáta a dhearbhaigh Coiste na mBuanionadaithe an comhaontú comhréitigh	18 Nollaig 2019
An dáta a vótáil Coiste um an gComhshaol, um Shláinte Phoiblí agus um Shábháilteacht Bia Pharlaimint na hEorpa leis an gcomhaontú comhréitigh a fhormhuiniú	21 Eanáir 2020
Dáta an chomhaontaithe pholaitiúil i gCoiste na mBuanionadaithe (mír I/A)	5 Feabhra 2020
Dáta an chomhaontaithe pholaitiúil sa Chomhairle (mír I/A)	18 Feabhra 2020
An dáta a ghlac Coiste na mBuanionadaithe an seasamh ón gComhairle (mír I/A)	20 Márta 2020
An dáta a glacadh an seasamh ón gComhairle, an chéad léamh	7 Aibreán 2020

(mír I/A)

2. CUSPÓIR AN TOGRA ÓN gCOIMISIÚN

Is teoranta an acmhainn é an t- uisce san Aontas Eorpach, agus tá an tríú cuid de chríoch an Aontais faoi strus maidir le hacmhainní uisce. Mar thoradh ar riachtanais an daonra a bhfuil fás fúthu i gcónaí, maille le torthaí an athraithe aeráide, is dúshlán níos mó fós a bheidh ann amach anseo san Eoraip an méid uisce a theastóidh a chur ar fáil, agus an t- uisce sin ar an gcáilíocht a theastaíonn.

An togra maidir le híoscheanglais le haghaidh athúsáid uisce, is é is cuspóir dó cuidiú le laghdú ar ghanntanas uisce ar fud an Aontais, i gcomhthéacs an oiriúnaithe don athrú aeráide, go háirithe trí bhreiseiú ar athúsáid uisce san uisciú talmhaíochta.

Mar aon le bearta um bainistiú éilimh agus um éifeachtúlacht, tá an athúsáid uisce ina huirlis thábhachtach i gcomhthéacs an bhainistithe uisce chomhtháite. Ba cheart an athúsáid a spreagadh i gcás inarb ábhartha agus costéifeachtach agus ba cheart, san am céanna, an tsláinte phoiblí a choimirciú agus cosaint an chomhshaoil a áirithiú.

Leagtar amach sa togra íoscheanglais chomhchuibhithe le haghaidh cháilíocht an uisce a mhéid a bhaineann sé le fuíolluisce uirbeach cóireáilte a athúsáid go sábháilte san uisciú talmhaíochta. Chun go mbeadh sé oiriúnach le haghaidh úsáid talmhaíochta, ba ghá an fuíolluisce uirbeach a rinneadh a chóireáil ar dhóigheanna áirithe faoi na rialacha sa Treoir maidir le Cóireáil Fuíolluisce Uirbigh a chóireáil a thuilleadh chun na híospharaiméadair cháilíochta a chomhlíonadh.

Trí bhíthin íoscheanglais a leagan síos, déantar foráil leis an togra do chur chuige comhchuibhithe maidir le hathúsáid uisce le haghaidh uisciú talmhaíochta ar fud an Aontais. Áiritheofar leis sin cothrom iomaíochta do na hoibreoirí atá ag táirgeadh agus ag soláthar uiscí athshlánaithe, agus do na feirmeoirí.

Meastar go bhféadfaí tuairim is 6.6 billiún m³ uisce a athúsáid gach bliain le haghaidh uisciú talmhaíochta de bharr na hionstraime atáthar a mholadh, i gcomparáid le 1.7 billiún m³ in aghaidh na bliana sa chás ina mbeifí gan aon chreat dlí de chuid an Aontais. Ach athúsáid a dhéanamh de níos mó ná 50 % den toilleadh iomlán uisce atá ar fáil go teoiriciúil le haghaidh uisciú ó ghléasraí cóireála fuíolluisce san Aontas, sheachnófaí níos mó ná 5 % den astarraingt dhíreach as dobharlaigh agus as an screamhuisce. Mar thoradh air sin, ba lú de bhreis agus 5 % an strus a bheadh ar na hacmhainní uisce ina n-iomláine.

4. TRÁCHTANNA MAIDIR LEIS AN SEASAMH Ó PHARLAIMINT NA hEORPA

Sa seasamh ó Pharlaimint na hEorpa, an chéad léamh, a glacadh an 12 Feabhra 2019, moladh leasuithe ar an togra ón gCoimisiún, agus moladh go sonrach:

- tagairtí do leathnú raon feidhme na reachtaíochta amach anseo;
- freagrachtaí nua a thabhairt do ghníomhaithe sa chóras athúsáide uisce cé is moite d'oibreoirí na ngléasraí athshlánaithe uisce; agus
- ról níos suntasaí a thabhairt do na húdaráis inniúla.

Ina theannta sin, thug Parlaimint na hEorpa forálacha sonracha isteach chun dul i ngleic leis na rioscaí a d'fhéadfadh a bheith ann ó mhicreaphlaistigh. Mar chuid den chomhaontú ar

thángthas air sa chruinniú tríthaobhach, d'aithin an Coimisiún gur ábhar mór inní na micreaphlaistigh agus thug sé gealltanais go gcuirfeadh sé lena iarrachtaí chun aghaidh a thabhairt ar an tsaincheist sin. Chun na críche sin, chomhaontaigh an Coimisiún an dearbhú seo a leanas a eisiúint: *“Aithníonn an Coimisiún gur substaintí iad na micreaphlaistigh a bhfuil inní ag éirí fúthu maidir le cáilíocht an uisce. I bhfianaise an mhéid sin, agus ó mheastar gur saincheist ghinearálta é sin nach bhfuil teoranta don uisce athshlánaithe, geallann an Coimisiún cur lena iarrachtaí chun aghaidh a thabhairt ar an tsaincheist thábhachtach seo.”*

Tar éis don Chomhairle a seasamh a ghlacadh ar an gcéad léamh, táthar ag súil go ndéanfaidh Parlaimint na hEorpa an comhaontú ar thángthas air sna cruinnithe tríthaobhacha a fhormhuiniú go foirmiúil.

5. TRÁCHTANNA MAIDIR LEIS AN SEASAMH ÓN gCOMHAIRLE

Tá an seasamh ón gComhairle ina léiriú ar an gcomhaontú ar thángthas air sna cruinnithe tríthaobhacha. I gcomparáid leis an togra ón gCoimisiún, áirítear an méid seo a leanas ar na hathruithe is mó tábhacht a tugadh isteach:

- clásal lánroghnach lena gceadaítear do na Ballstáit cinneadh a dhéanamh cé acu a cheadófar athúsáid uisce ina gcríoch nó i gcuid dá gcríoch nó nach gceadófar, faoi réir dianchoinníollacha agus faoi réir athbhreithniú cuí a dhéanamh go rialta féachaint an bhfuil údar cuí leis na cinntí sin;
- coincheap an “chórais athúsáide uisce” a thabhairt isteach, rud ar féidir dó roinnt gníomhaithe a chuimsiú, ar a n-áirítear gníomhaithe mar an t-oibreoir gléasra athshlánaithe agus an t-úsáideoir deiridh;
- ról níos suntasaí do na húdaráis phoiblí atá i mbun bainistíocht riosca; agus
- breis solúbthachta do na Ballstáit agus iad i mbun eagrú an chórais údarúcháin agus an chórais bainistíochta riosca.

Sa chomhaontú ar thángthas air, coimeádtar cuspóirí an togra tosaigh ón gCoimisiún ar an iomlán, eadhon coinnítear leibhéal uailmhéine na n-íoscheanglas ach ceadaítear an tsolúbthacht is mian leis na Ballstáit a bheith acu agus iad ag cur na rialacha nua chun feidhme.

6. CONCLÚID

Glacann an Coimisiún leis an seasamh ón gComhairle.